

陳母許宜人哀挽錄

吳在橋先生贈

陳以許宜人

袁挽錄遜



陈

陳母許宜人遺像



猗維海東實生
賢母鮑孟之傳今
昔罕有井曰躬
操勤儉克守令
儀泝德籍人
口遺容宛在永
垂不朽

吳山敬題



陳母許宜人像贊

同此裙釵胡爲尊於儕輩同此巾幗胡爲貴於等倫蓋由其德功美善言容溫
純翁姑孝順妯娌和親相夫子擴充基業訓兒孫備致陶甄旣克勤而克儉復
行恕而行仁以故實至名歸榮邀光龍根深葉茂慶衍趾麟顧何以眉齊卅載
脾倦數旬忽空五蘊猝脫六塵形雖匿跡像獨留真緬坤儀者人以爲清氣超
凡乃仙姑之應世我以爲慈容似佛實大士之現身

七十七叟劉培元題

墓誌銘

福建思明 周殿薰 墨史

人情易娶婦難嫁女然得佳壻僅門楣光得婦賢奉尊章相良人教子女一家
宜之數世賴之與得佳壻孰爲多若吾厦許宜人者可謂賢婦已宜人父諱清
蓮世居厦門今爲思明縣年二十四嬪同里同知銜陳君友志爲河洲封翁冢
媳生以同治二年癸亥六月二十三日酉時以民國乙丑十二月二十二日子
時卒享壽六十有三將以今歲丙寅二月朔塋於金榜山之原其長子獎勵增
生杰以行述請爲銘且泣曰吾母之歿也吾大父哭之慟詔不孝等曰余年耄
眼昏回憶汝先祖母黃去世汝父年十四汝母雖弗逮事姑然事余及汝先繼
祖母盡孝敬旦奉盥櫛昏視衾簞數十年如一日家事任長汝母惟謹惟慎不
敢專其孝行有大過人者奈何先余而歿耶家人皆哭吾父忍哭慰大父曰兒

婦入吾門四十載得尊長仁卹幸無尤所遺憾者婦道未終耳吾父勿過傷以增兒婦罪也扶入出撫尸哭曰我上有老父賴汝是養下有兒孫惟汝是依汝與吾畢生未嘗齟齬相敬如賓也日理中饋夜事女紅汝之勤也布衣粗飯克已待人汝之儉也吾年垂六十方期與汝偕老胡舍我而去耶家人哭益失聲嗚呼卽此可知宜人之賢矣蓋河洲封翁今年八十有五一家男女近百口而友志承封翁商業數往來臺灣南洋諸島承事父母婚嫁弟妹課督子婦事事多賴宜人宜人處爲婦爲母之間居娣姒之長上下和睦俾友志專心商業以代父勞而家日興盛子孫循循守規矩故其歿也無老少尊卑皆哀之如此可謂賢婦矣宜人生子三杰冬康杰娶吳冬十九歲殤康聘林媵先宜人卒遺子乾娶黃黃先卒筵室生子三文仰奎女三均未婚媵筵皆不知其姓從宜人姓許宜人撫諸子女如已出諸子女亦皆母宜人孫八杏村竹村宗村東村昌村

杰出漢村冬出南村閔村乾出女孫九穴坐丁向癸卦坐火風鼎內三爻卦向
水雷屯放水出寅口大水口出亥由己龍入首合人元卦銘曰

夫稱順子稱慈在恒人易爲儀夫與子情或私有翁在明徵辭孰爲婦盡孝思
孰爲孝翁念茲惟宜人家室宜宜人死翁哭之翁稱孝夫益悲夫稱順子涕洟
死也哀生可知曷爲銘銘以斯

祭文一

陳允彩 林嘉壽 陳亮奎

陳清波 戴蒸然 洪雪堂

岑社如姪陳桂琛 林增來 馮開讓

李槃璜 李肇基 洪燾生

楊迺秀 洪立勳 陳耀錕

維丙寅之歲二月朔日主祭陳桂琛等謹以香楮酒醴庶饗之儀敬奠於

陳老伯母許宜人之靈曰嗚呼祥鸞影化天邊去竊藥之靈姬青鳥使摧海外

杏捧桃之仙女痛閨儀之頓謝薤露歌聞嗟壺範之就湮蓬雲盼斷况當歲逢

與蜡萱草凋零又是日紀藏闔曇花幻化有不登堂肅拜瞻丹旆以告誠聞計

傷心對素帷而作弔也乎恭繫 宜人高陽右族泰岳 幼秉慧心少成淑

性守刈荆之嚴訓望重庾芳評詠絮之清詩才高謝蘊

梅載詠
李興

歌爰以旌品之名媛嬪於潁川之貴胄芳傳鳴鳳早毓秀於箕山筮叶飛鳳諧
畫眉於嬌水維時

太翁爰占大吉邁受福於西鄰家本素封擅厚生於北

阮 宜人則易衣以出椎髻而前雖叱狗無聲弗違鮑姑之事而聞鷄能省克
承聲子之歡奉甘旨於尊嫜追隨夙夜潔蘋蘩於宗祖陳薦芳馨相夫子以牽
車泛海宏陶朱之業琢佳兒而成器游泮頌魯僖之歌德副笄珈儀修巾櫛洵
持家之健婦實主饋之令妻而且媿媿逮下抑抑柔嘉妯娌雍和庭闈胥昭豫
順鄉鄰洽比井閭咸被薰蒸聯同氣於弟昆愛敦手足篤深情於戚屬誼重朱
陳不獨大義兼通視庶子如己子抑復慈心廣布能愛人而濟人恤寡憐貧囊
縱傾而奚惜扶危周急釵雖典其何嫌待澤者期功彊近之親感思者婢媼臧
獲之輩懿難指屈德猶耳鳴以故六子綴庭桂之芬諸孫簇堦蘭之蔭慶耆年

而祝兕樂頤養以扶鳩方期鳳誥聿膺太夫人起居八座龜齡永錫女菩薩活
現十方者矣奈何月影埋輝發光隱曜庭空慈竹遽傾天姥之峯國返蓮花莫
挽飛瓊之駕渺幽蹤於臘八夢咽啼鴉歷小劫而餘三悲深鶴馭琛等情關梓
里契重蘭盟式懿範以無從望徽音而莫睹用是芻陳一束椒獻三尊魂兮歸
來歆斯苾薦靈其如在鑒此葵忱尙饗

祭文二

維中華民國十有五年歲次丙寅二月朔日廈門東社諸同人謹以清酌庶饒
之儀致祭於

陳老伯母許且人之靈曰絜名門之鼻祖根太岳而發祥本鷺江之望族蔚苗
裔於高陽有柔嘉之淑媛叶雅度於珩璜具璇閨之竊窈爲珂里所稱揚迨年
華兮花信爰來嬪於義門分居娣姒之長孝養舅姑之尊歲時潔其祭祀中饋

主其饗殯紆良人之內顧恒服賈而出門季蘭矢有齋之敬樛木普逮下之恩
故能人言無間於鄉黨家慶垂裕於後昆舉凡冠婚喪葬以逮米鹽瑣屑縫紉
澣濯不知者以爲宜人操勞之慣其知者以爲宜人庸行之敦至於嫁婢亦備
厚匳憐嫗代爲立後等視庶出之諸兒善奉高年之君舅相夫則舉案齊眉弄
孫則含飴在口乾坤呈六子之祥伉儷閱卅年之久在家庭不愧完人在社會
交推賢母奈之何蒼蒼者天猶不能錫之以遐齡而僅僅畀之以中壽然而惟
母素留懿訓有子悉秉義方內而庭闈雍睦外而臺嶠經商續書香於鄴架恢
世業於浮梁懋遷能善繼善述福祚自寢熾寢昌今日者萱蔭雖傷彫萎椿齡
克享綿長妥慈靈於仙界承重慶於高堂同人等式瞻遺範敬爇瓣香聊慰黃
門之哀悼願操彤管以揄揚固將爲百代女宗之式而不徒增一門家乘之光
母兮有知應亦來格來歆左驂鸞右跨鳳而降臨於白雲之鄉尙饗

誄詞一

福建同安 吳錫璜 瑞甫

歲次修陟之年 陳母許宜人茂德云卒其哲嗣熙堂等以行述請予誄其事
余惟誄者累也始於周禮太祝之六詞蓋猶行古之道也然考古者賤不誄貴
幼不誄長余何人斯而敢以誄宜人耶竊考近世以來柳妻誄惠子爲私誄所
自始則所云誄者以寓哀也以揚媿也余雖乏江淹之筆何敢以不文辭謹仿
旌美曜實之義爰作誄曰

惟許宜人太嶽稱先四德兼備六子象賢堪推品媛足耀女嬀年二十四來歸
於陳淑恭淑慎如友如賓上和下睦一視同仁集木臨谷視故如斯阿翁耄耄
色笑躬親睇不遑鏡起未司晨算常紀鶴瑞兆降麟承歡鳩杖烏雀胥馴諸姑
伯姊迄未返唇一庭雍穆滿室熙春於欽宜人天蔚淑馨如臨師保若奉箴銘

相夫營業教子讀經輯榮誕慶合錫周鈴相期偕老永作儀型胡爲二豎如影
隨形腸風坎壈忒腐羶腥支離牀第瘦骨伶仃陶鈞元氣灌溉侵苓毒降浸亂
藥石靡靈西池花謝漣如涕零樛螽廻溯福恆樞局滫瀡滑和重親克齡天忱
不佑身赴杳冥嗚呼痛哉大夢不醒慨念時髦平權鵲起四德不修競談歐美
足削就履橘踰爲枳閨門之間釀成禍水於欽宜人睢鳩同軌女宗遽傾淚血
蒿里亦有才慧矜昔謝鮑跌宕不羈爭妍鬥巧怒發英華動如兔狡於欽宜人
躬淑德飽如何靈嫺遽遭屈撓大夫君子式好無尤蘭陔華黍厥草油油適構
閔凶塋田泣周逮撫羣媵涕泗交流虞歌聽卒楚些吟成樂道人善乃及鰥生
炯列遺行揭諸旒旌世有中壘宜播令名

誄詞二

宜人姓許氏古閩廈門人清蓮公之長女也廿四歲于歸陳君廚中三日親手調羹席上經年齊眉舉案賢明素著井臼躬操事君舅而盡心待庶子如已出勞瘁迭乘遽攫弱疾而終其天年春秋六十有三乙丑歲冬十二月甲子卒於家嗚呼哀哉僕與熙堂昆仲辱屬神交竊高雅誼用假霜毫藉彰彤管傳來雅節將期百歲千秋記取徽音敢謂雪泥鴻爪乃作誄曰

稽古載籍允稱婦德小以寧家大將華國叔季是丁時維昏惑放佚不羈寧盡厥職溫溫宜入實家之式溯其源流嘉禾古邑清門允孚懿德是集比及于歸溫恭敬飭君舅云耄敬事靡忒夫子服商重洋遠出宗族實繁克盡睦輯言無疾聲動無厲色婚祭米鹽瘁其心力何期積勞罹茲疢疾血氣其衰胃逆却食載寢載興時瘥時亟游子未還不遑家室或赴壘川或之臺北寤言以思潛然以泣函去電馳歸來星急侍疾雖遲瞻顏猶及悠悠蒼天竟以隕卒嗚呼哀哉

溯其生時靜調琴瑟庶子已繁撫之無嫉御下以恩曾無怒叱教子以經俾克成立家政儉勤修其蠶織宜享大年遽分比翼畫堂月寒空林霧塞哀此安仁神傷心惻夙慕高風爲文載筆賢哉宜人爲世楷則嗚呼哀哉

誄詞三

福建同安 陳秉璋 河洲

陳君友志自清季時熱心興學與余父子爲道義交余深知其傳家以孝友待人以至誠故能得許宜人爲賢婦爲賢母以善事翁姑善教子女宜於妯娌及媵筵以襄家道之興隆余讀其行述知許宜人之賢雖由得天獨厚然有是婦緣有是夫有是夫緣有是翁成之也今宜人之賢年過花甲有三先翁夫而作古爰爲之誄曰

婦人四德宜人有之爲陳家母不忒其儀情孚老幼德感尊卑翁姑稱孝兒婦